



ՀԵՌՈՒՄՏԱՏԵՍՈՒԹՅԱՆ ԵՎ ՌԱԴԻՈՅԻ ՀԱՆՁՆԱԺՈՂՈՎ

ՈՐՈՇՈՒՄ

23 հունվարի 2026 թվականի թիվ 14-Ա

ք.Երևան

«ՏՈՍՊԱ» ՌԱԴԻՈԸՆԿԵՐՈՒԹՅԱՆ ԽՄԲԱԳՐՈՒԹՅՈՒՆ ՓԲ ԸՆԿԵՐՈՒԹՅԱՆ ՆԿԱՏՄԱՍԲ ՎԱՐՉԱԿԱՆ ՏՈՒՅԺ ԿԻՐԱՌԵԼՈՒ ՄԱՍԻՆ

Հեռուստատեսության և ռադիոյի հանձնաժողովը (այսուհետ նաև՝ Հանձնաժողով), ուսումնասիրելով 2025 թվականի դեկտեմբերի 26-ին իր նախաձեռնությամբ հարուցված թիվ 74 վարչական վարույթի նյութերը, *պարզեց*.

Հանձնաժողովը «Տեսալսողական մեդիայի մասին» օրենքով (այսուհետ նաև՝ Օրենք) իրեն վերապահված վերահսկողական գործառնություններն իրականացնելիս, ինչպես նաև ղեկավարվելով Օրենքի 32-րդ հոդվածի 2-րդ մասով, 2025 թվականի դեկտեմբերի 16-ի թիվ Ե/01/03.1/1019-25 գրությամբ «ՏՈՍՊԱ» ՌԱԴԻՈԸՆԿԵՐՈՒԹՅԱՆ ԽՄԲԱԳՐՈՒԹՅՈՒՆ ՓԲ ընկերությունից (այսուհետ նաև՝ Հեռարձակող կամ Ընկերություն) պահանջել է ներկայացնել «ՄՊՈՒՏՆԻԿ ԱՐՄԵՆԻԱ» լսողական ծրագրի 2025 թվականի նոյեմբերի 5-ից 7-ն ընկած ժամանակահատվածի ձայնագրությունները:

Ի պատասխան վերոնշյալ գրության՝ 2025 թվականի դեկտեմբերի 24-ին Հանձնաժողովի քարտուղարության էլեկտրոնային՝ secretariate@tvradio.am հասցեին մուտքագրվել է Ընկերության 2 էլեկտրոնային գրություն, որոնցից մեկը պարունակել է հղումներ, իսկ մյուս էլեկտրոնային գրությունը պարունակել է ուղեկցական գրություն (մտից՝ ՄԳ/1084-25):

Հանձնաժողովի ծրագրերի մոնիտորինգի և վերահսկողության վարչության կողմից 2025 թվականի դեկտեմբերի 24-ին և 25-ին իրականացվել է վերոնշյալ հղումներում ներառված նիշքերի (Ֆայլերի) մշտադիտարկում: Մշտադիտարկման արդյունքում հայտնաբերվել են Օրենքի դրույթների պահանջների առերևույթ խախտման հատկանիշներ, և 2025 թվականի դեկտեմբերի 26-ին կազմվել է տեսալսողական մեդիաձառնություն մատուցողի գործունեության մշտադիտարկման իրականացման և արդյունքների վերաբերյալ արձանագրություն (այսուհետ՝ Արձանագրություն):

Ըստ Արձանագրության՝ ներկայացված հղումներում պարունակվող նիշքերը (Ֆայլերը) չեն ներառում պահանջված՝ 2025 թվականի նոյեմբերի 5-ից 7-ն ընկած ժամանակահատվածի ձայնագրություններն ամբողջությամբ, մասնավորապես՝ բացակայում են ստորև նշված ժամանակահատվածները.

05.11.2025թ. ժամը 00:00:00-07:00:00, 12:00:00-13:00:00, 15:00:00-17:00:00, 20:00:00-22:00:00,

06.11.2025թ. ժամը 00:00:00-07:00:00, 12:00:00-13:00:00, 15:00:00-17:00:00, 20:00:00-22:00:00,

07.11.2025թ. ժամը 00:00:00-07:00:00, 12:00:00-13:00:00, 15:00:00-17:00:00, 20:00:00-22:00:00:

Համաձայն Օրենքի 42-րդ հոդվածի 18-րդ մասի՝ Արձանագրությունը կարող է հիմք հանդիսանալ վարչական վարույթ հարուցելու համար, իսկ հարուցված վարչական վարույթի շրջանակներում ծառայել որպես ապացույց:

Հանձնաժողովը, հիմք ընդունելով Արձանագրությունը և ղեկավարվելով «Վարչարարության հիմունքների և վարչական վարույթի մասին» օրենքի 30-րդ հոդվածի 1-ին մասի «բ» կետով, 2025 թվականի դեկտեմբերի 26-ին Հեռարձակողի նկատմամբ հարուցել է թիվ 74 վարչական վարույթ:

Հանձնաժողովը հարուցված վարչական վարույթի մասին 2025 թվականի դեկտեմբերի 29-ի թիվ Ե/04/04.1/1066-25 գրությամբ ծանուցել է Հեռարձակողին և հայտնել, որ այս հարցի վերաբերյալ կարող են ներկայացնել իրենց պարզաբանումները և բացատրությունները:

Հեռարձակողը վերոնշյալ գրության և հարուցված վարչական վարույթի վերաբերյալ պարզաբանումներ և բացատրություններ չի ներկայացրել:

Հանձնաժողովի հիմնավորումները (պատճառաբանությունը) և եզրակացությունը.

Վարչական վարույթի բազմակողմանի, լրիվ և օբյեկտիվ քննության, ձեռք բերված ապացույցների ուսումնասիրության և գնահատման արդյունքում արձանագրում ենք հետևյալը.

Օրենքի 2-րդ հոդվածի 1-ին մասը սահմանում է.

«Հայաստանի Հանրապետության տեսալսողական մեդիայի մասին օրենսդրությունը ներառում է Հայաստանի Հանրապետության Սահմանադրությունը, սույն օրենքը, «Չանգվածային լրատվության մասին», «Էլեկտրոնային հաղորդակցության մասին», «Հեղինակային իրավունքի և հարակից իրավունքների մասին», «Լեզվի մասին», «Գովազդի մասին» օրենքները, Հայաստանի Հանրապետության ընտրական օրենսգիրքը, կարգավորող պետական մարմնի իրավական ակտերը, տեսալսողական մեդիայի ոլորտը կարգավորող այլ իրավական ակտեր և Հայաստանի Հանրապետության միջազգային պայմանագրերը»:

Օրենքի 3-րդ հոդվածի 1-ին մասի 1-ին կետի համաձայն՝ տեսալսողական մեդիաձառայություն մատուցող (այսուհետ՝ Հեռարձակող, լսողական մեդիաձառայություն մատուցող՝ Լսողական ծրագրեր հեռարձակող) Հայաստանի Հանրապետության հիմնադրած կազմակերպություն կամ կարգավորող պետական մարմնի հեղինակագործ ֆիզիկական կամ իրավաբանական անձ, որը կազմում և սպառողին է ներկայացնում տեսալսողական տեղեկատվություն և խմբագրական պատասխանատվություն է կրում տեսալսողական արտադրանքի բովանդակության համար.

Օրենքի 13-րդ հոդվածի 1-ին մասի համաձայն՝ լիցենզիա ստացած Հեռարձակողները պարտավոր են վարել տեսալսողական հաղորդումների հաշվառման էլեկտրոնային մատյան և պահպանել իրենց հեռարձակած տեսալսողական հաղորդումների տեսագրություններն ու ձայնագրությունները՝ հեռարձակման օրվանից սկսած 45 օր ժամկետով, բացառությամբ սույն օրենքի 22-րդ հոդվածի 6-րդ մասի 3-րդ կետի «գ» ենթակետով նախատեսված դեպքերի:

Օրենքի 32-րդ հոդվածի 1-ին մասի 14-րդ կետի համաձայն՝ Հանձնաժողովը իրականացնում է Հեռարձակողների և օպերատորների գործունեության մշտադիտարկում:

Օրենքի 32-րդ հոդվածի 2-րդ մասի համաձայն՝ «կարգավորող պետական մարմինը սույն օրենքով սահմանված սուբյեկտներից, պետական մարմիններից և պաշտոնատար անձանցից պահանջում և ստանում է անհրաժեշտ փաստաթղթեր և այլ տեղեկատվություն»:

Օրենքի 42-րդ հոդվածի 1-ին մասի համաձայն՝ Հեռարձակողների գործունեության մշտադիտարկումն իրականացվում է ուղղակի դիտարկման, իսկ օպերատորի դեպքում՝ նաև տեղում դիտարկում իրականացնելու միջոցով, իսկ նույն հոդվածի 8-րդ և 9-րդ մասերը սահմանում են.

«8. Մշտադիտարկման արդյունքներով կարգավորող պետական մարմնի ներկայացուցիչը մշտադիտարկման արդյունքների վերաբերյալ կազմում է արձանագրություն:

9. Մշտադիտարկման արդյունքների վերաբերյալ արձանագրության մեջ նշվում են մշտադիտարկման արդյունքների համառոտ շարադրանքը, ինչպես նաև վարչական վարույթ հարուցելու կամ հարուցված վարչական վարույթի համար էական նշանակություն ունեցող բոլոր փաստական հանգամանքները, այդ թվում՝ վարույթի մասնակիցների օգտին առկա հանգամանքները:»:

Հիմք ընդունելով տեսալսողական մեդիայի բնագավառը կարգավորող օրենսդրությունը, ինչպես նաև վերոգրյալ իրավական դրույթները՝ Հանձնաժողովն արձանագրում է.

Հեռարձակողը լսողական հաղորդումները հեռարձակելիս պարտավոր էր պահպանել Օրենքի սահմանող դրույթները:

Քննարկվող համատեքստում հատկանշական է, որ Հեռարձակողը 2017 թվականից հանդիսանում է Հանձնաժողովի կողմից լիցենզավորված իրավաբանական անձ լսվողման տարածքը՝ ք.Երևան, 106.0 ՄՀց հաճախականություն, լիցենզիայի համարը՝ N 240, գործողության ժամկետը՝ 06.10.2017թ.-06.10.2027թ.[]:

Հեռարձակողը պետք է հաշվի առնի, որ օրենքներով հստակ սահմանվում են իրավական նորմեր, որոնց չպահպանելն առաջացնում է իրավական հետևանքներ, և ի թիվս այլնի, Հեռարձակողը պատասխանատվություն է կրում տեսալսողական մեդիայի բնագավառը կարգավորող օրենսդրության պահանջների կիրարկման ապահովման համար:

Հանձնաժողովը՝ որպես տեսալսողական մեդիայի բնագավառը կարգավորող պետական մարմին, Օրենքով վերապահված իր վերահսկողական լիազորություններն իրականացրել է Հանձնաժողովի կողմից գրավոր հարցման ձևաչափով:

Այսպես, հիմք ընդունելով Օրենքի դրույթները և ձեռք բերված փաստերը՝ արձանագրում ենք.

Հանձնաժողովն, իր վերահսկողական գործառնություններն իրականացնելիս և հիմք ընդունելով Օրենքի 32-րդ հոդվածի 2-րդ մասը, Հանձնաժողովի 16.12.2025 թվականի թիվ Ե/03/03.1/1019-25 գրությամբ «ՏՈՍՊԱ» ՌԱԴԻՈԸՆԿԵՐՈՒԹՅԱՆ ԽՍԲԱԳՐՈՒԹՅՈՒՆ ՓԲ ընկերությունից պահանջել է ներկայացնել «ՄՊՈՒՏՆԻԿ ԱՐՄԵՆԻԱ» լսողական ծրագրի 2025 թվականի նոյեմբերի 5-ից 7-ն ընկած ժամանակահատվածի ձայնագրությունները:

Հեռարձակողի համար լսողական հաղորդումների ձայնագրությունները պահպանելու պարտավորությունը սահմանված է Օրենքի 13-րդ հոդվածի 1-ին մասով, համաձայն որի՝ լիցենզիա ստացած Հեռարձակողները պարտավոր են վարել տեսալսողական հաղորդումների հաշվառման էլեկտրոնային մատյան և պահպանել իրենց հեռարձակած տեսալսողական հաղորդումների տեսագրություններն ու ձայնագրությունները՝ հեռարձակման օրվանից սկսած 45 օր ժամկետով:

Հեռարձակողն, ի պատասխան Հանձնաժողովի վերոնշյալ գրության, 2025 թվականի դեկտեմբերի 24-ին Հանձնաժողովի քարտուղարության էլեկտրոնային՝ secretariate@tvradio.am հասցեին է ուղարկել 2 էլեկտրոնային գրություն, որոնցից մեկը պարունակել է հղումներ, իսկ մյուս էլեկտրոնային գրությունը պարունակել է նաև ուղեկցական գրություն (մտից՝ ՄԳ/1084-25):

Սակայն Հանձնաժողովի ծրագրերի մոնիտորինգի և վերահսկողության վարչության կողմից իրականացված մշտադիտարկման արդյունքում պարզվել է, որ Հեռարձակողի կողմից ներկայացված հղումներում ներառված նիշերը (Ֆայլերը) չեն ներառում պահանջված՝ 2025 թվականի նոյեմբերի 5-ից մինչև 7-ն ընկած ժամանակահատվածի ձայնագրություններն ամբողջությամբ:

Այսպիսով, Հեռարձակողը փաստացի չի կատարել Օրենքի 13-րդ հոդվածի 1-ին մասի պահանջը, այն է՝ վարել տեսալսողական հաղորդումների հաշվառման էլեկտրոնային մատյան և *պահպանել իր հեռարձակած տեսալսողական հաղորդումների տեսագրություններն ու ձայնագրությունները՝ հեռարձակման օրվանից սկսած 45 օր ժամկետով*, և չի ապահովել Հանձնաժողովի կողմից պահանջված՝ Օրենքով պարտադիր պահպանման ամբողջական տեղեկատվության տրամադրումը: Արդյունքում Հանձնաժողովը գրկվել է իրավասու վերահսկողական լիազորությունների իրականացման հնարավորությունից:

Այսպես, հիմք ընդունելով Օրենքի դրույթները և վերոնշյալ փաստական հանգամանքները՝ արձանագրում ենք, որ Հեռարձակողը, 2017 թվականից հանդիսանալով Հանձնաժողովի կողմից լիցենզավորված իրավաբանական անձ և տեղյակ լինելով տեսալսողական մեդիայի ոլորտը կարգավորող Օրենքի դրույթներին, չի ապահովել Օրենքով պարտադիր տեղեկատվության տրամադրումը, որի ներկայացումն իրականացվում է Օրենքի համապատասխան դրույթներից բխող իրավական պարտավորության շրջանակում:

Օրենքի 32-րդ հոդվածի 1-ին մասի 11-րդ կետի համաձայն՝ կարգավորող պետական մարմինը՝ Օրենքի խախտման կամ իր որոշումները չկատարելու դեպքում կիրառում է պատասխանատվության միջոցներ:

Օրենքի 55-րդ հոդվածի 1-ին մասի համաձայն՝ Կարգավորող պետական մարմնի կողմից տեսալսողական մեդիայի բնագավառը կարգավորող օրենսդրության պահանջների խախտման դեպքեր հայտնաբերվելու, ինչպես նաև պետական այլ մարմինների կողմից իրենց իրավասությունների շրջանակում տեսալսողական մեդիայի բնագավառը կարգավորող օրենսդրության պահանջների խախտման դեպքեր հայտնաբերվելու և դրանց մասին կարգավորող պետական մարմնին գրավոր տեղեկացվելու դեպքում կարգավորող պետական մարմինը կիրառում է հետևյալ վարչական տույժերը.

1) գրավոր նախազգուշացում.

2) տուգանք.

3) հեղինակագործման կամ լիցենզիայի գործողության կասեցում.

4) հեղինակագործման կամ լիցենզիայի գործողության դադարեցում:

Օրենքի 57-րդ հոդվածի 17-րդ մասի համաձայն՝ Հեռարձակողի կողմից հեռարձակված հաղորդումների տեսագրությունները և ձայնագրությունները սույն օրենքով սահմանված ժամկետով չպահպանելը՝

առաջացնում է տուգանքի նշանակում՝ Հասույթի 0.02 տոկոսի, բայց ոչ պակաս, քան սահմանված նվազագույն աշխատավարձի երեքհարյուրապատիկի չափով:

Ելնելով վերոգրյալից, հիմք ընդունելով «Տեսալսողական մեդիայի մասին» օրենքի 13-րդ հոդվածի 1-ին մասը, 32-րդ հոդվածի 1-ին մասի 11-րդ և 14-րդ կետերը, 32-րդ հոդվածի 2-րդ մասը, 42-րդ հոդվածի 1-ին, 8-րդ և 9-րդ մասերը, 55-րդ հոդվածի 1-ին մասի 2-րդ կետը և ղեկավարվելով Օրենքի 57-րդ հոդվածի 17-րդ մասով՝ Հեռուստատեսության և ռադիոյի հանձնաժողովը

Ո Ր Ո Շ Ե Ց

1. «ՏՈՍՊԱ» ՌԱԴԻՈԸՆԿԵՐՈՒԹՅԱՆ ԽՍԲԱԳՐՈՒԹՅՈՒՆ ՓԲ ընկերության նկատմամբ կիրառել «Տեսալսողական մեդիայի մասին» օրենքի 57-րդ հոդվածի 17-րդ մասով սահմանված տույժը՝ տուգանելով 300 000 (երեք հարյուր հազար) ՀՀ դրամի չափով:

2. Սույն որոշումն ուժի մեջ է մտնում այն «ՏՈՍՊԱ» ՌԱԴԻՈԸՆԿԵՐՈՒԹՅԱՆ ԽՍԲԱԳՐՈՒԹՅՈՒՆ ՓԲ ընկերությանը պատշաճ ձևով հանձնելու օրվան հաջորդող օրվանից:

3. Սույն որոշումն ուժի մեջ մտնելու պահից երկամսյա ժամկետում կարող է բողոքարկվել Հեռուստատեսության և ռադիոյի հանձնաժողով կամ ՀՀ վարչական դատարան:

**ՀԵՌՈՒՄՏԱՏԵՍՈՒԹՅԱՆ ԵՎ ՌԱԴԻՈՅԻ
ՀԱՆՁՆԱԺՈՂՈՎԻ ՆԱԽԱԳԱՀԻ
ՊԱՇՏՈՆԱԿԱՏԱՐ**

Ն. ՀԱԽՎԵՐԴՅԱՆ

2026թ. հունվարի 23
ք. Երևան